

權驅由此以後各國隨是教者亦漸皆興盛而格致諸學亦大行於天下矣此中國但知天主教之過不知耶穌教之益所以不學也

此稿未完

恭祝唐景星方伯七十開一壽序

沈毓桂

桐生維夏乍經浴佛之期桃熟爲春爰譜迎仙之曲印拓辛家之篆巧符甲子之重新算徵亥字之書欣睹庚寅之初度是必聿修厥德用能無滄爾神膏葉要在培根共樂喬松之歲月耀華更由敦本永延大椿之春秋純嘏爾常康強逢吉如

景星方伯世大人者其致之要有道矣方伯幼卽岐嶷長益練達有容乃大汪汪萬頃之

波獨立不移嶽嶽百盤之嶺英奇磊落渾厚精明克養太和自求多福含玉質而俱粹抱金心而不渝猶復學砥青藍衷盟丹白料事如數計而燭照應物亦鑑空而衡平有不榮名早炳於人先弗祿獨康於爾後羨修道之足以養壽推美意之可與延釐者乎茲於光緒一十八載歲在壬辰四月二十日爲方伯六十有一覽揆之辰敬陳納祉之由恭代引年之祝蓋方伯五羊右族雛鳳清聲鐙戀兒童書城自擁金權子母貨價能知惟慕終軍之請纓遂效范滂之纜轡所剏輪船招商局兼任開平煤礦轉軸轡於天末信涉波濤搜寶藏於地經功垂水火奚止齊民之要術俱關經國之遠圖凡所設施無慚貞士詎云科第乃有傳人此方伯之出處所以過人遠者也然方伯智珠在握內鏡恒懸謂俊傑貴乎識時卽富

強不難自致用譯泰西諸書藉乎語言文字究其禮樂兵刑惟披沙可以檢金亦礪石不妨
攻玉論其幹濟自異尋常宜乎 合肥伯相借爲山石之助有若水乳之融而 方伯內行
尤敦外言無間讓梨分棗不負初心竇桂田荆克諧同氣聞雞鳴而戒旦傳齋肅于蘋蘩覘
鯉對於趨晨表敬恭于橋梓庭闈嚴若朝典閭黨頌其家肥固宜群奉義門共蒸仁里而
方伯舟麥濟故困粟饋貧垂南山之雲蔭茲窮鳥決西江之水活此涸鱗在人皆已難能如
公更爲餘事于焉致修齡登上壽詎止洪範之早錫不將左券之先操哉 毓桂笠澤散才松
陵退士身如幕燕識類井蛙旣識斗山欲崇岱岳爲述耳鳴之陰德敬陳眉壽之祥徵祇瓦
奏之莫敵黃鐘藉缶鳴之以侑金爵此日筵開首夏思陪北海之賓朋他年酒進長春載獻
南山之禱頌

謝惠中西關繫略論

昨承惠美國進士林樂知先生所著中西關繫略論熟於中西交涉諸務語皆中肯印行旣
久言於昔而驗于今者幾如數計燭照拜讀之下欽佩非常宜其續印三次銷售一空今
格致書室主人又鐫於木并請林君增入 諭旨奏稿有益時務尤非淺鮮凡留心世道
者務各置一編於座右以裕識力以廣見聞焉

還讀書齋主人

西醫彙抄

德貞